



Letsatsi la Ditshwanelo tsa Botho

Arnold Mushwana
Thulisile Shongwe



Letsatsi la Ditshwanelo tsa Botho le
ketekiwa mo Aforikaborwa ka 21
Mopitlwe ngwaga le ngwaga.


Bukakanelo e, e ka ga hisitori ya
botlhokwa jwa letsatsi le.



Ka nako ya puso ya tlhaolele, bantsho ba Aforikaborwa ba ne ba gateletswe.

Batho ba ne ba lwa kgatlhanong le tlhaolele le melao ya teng ya kgatelelo. Ba ne ba lwela kgololesego le ditshwanelo tsa tekatekano.

Ka la 21 Mopitlwe ngwaga le ngwaga, naga e gopola balwelakgololesego.



Ka 21 Mopitlwe ka 1960 baagi ba Sharpeville le Langa ba ne ba tsena megwantong.

Ba ne ba lwantsha melao ya kgatelelo ya puso ya tlhaolele. Ba ne ba gwanta kgatlhanong le 'molao wa dipasa'.


Bangwati ba ne ba goa ba re, "Maatla!" Fa ba bangwe ba ne ba goa ba re, "A rona!"



Kwa Sharpeville, ba ne ba opela mme ba gwanta ka kagiso go ya kwa seteišeneng sa mapodisa.

Fa mapodisa a bona setlhopha sa batho, ba ne ba tlasela bagwanti.

Batho ba tshaba, bangwe ba ne ba gobala. Bangwe ba ne ba latlhegelwa ke matshelo.



21 Mopitlwe kwa tshimologong e ne e itsege
jaaka Letsatsi la Sharpeville.

Letsatsi la dirwa la boikhutso morago ga
ditlhopho tsa 1994 tsa temokerasi.

Naga e gopola balwelakgololesego. Ke tsela ya
go ba leboga.



Aforikaborwa e na le molaotheo wa temokerasi.
Bakwadi ba molaotheo ba ne ba batla gore
batho botlhe ba tlotle ditshwanelo tsa botho.

Molaotheo a Aforikaborwa o lwela ditshwanelo
le melao ya baagi botlhe. Batho botlhe ba na le
ditshwanelo tse di tshwanang.



Ngwaga le ngwaga ka 21 Mopitlwe, dikolo le
diofisi di a tswalwa.

Ke letsatsi la go keteka ditshwanelo tsa botho.
Ke letsatsi la go keteka tekatekano.

Batho ba keteka le go tlotla letsatsi le ka ditsela
tse di farologaneng.



Bana ba ka keteka letsatsi le ka go bua ka ditshwanelo tsa bona.

Ee, bana le bona ba na le ditshwanelo.


Ditshwanelo tsa bana ke tse di kgethegileng, tsa batho ba dingwaga tse di ka fa tlase ga 18.



Bana botlhe ba na le ditshwanelo tse di lekanang. A o itse ditshwanelo tsa gago?
“Tshwanelo ya go tlhokomelwa,” ga bua Ntombi.

“Tshwanelo ya go nna le leina!” ga goa Ntsaku.

“Tshwanelo ya go nna mo nageng ya me, kgotsa naga nngwe le nngwe,” ga bua Shadrack.



"Tshwanelo ya go babalesega," ga bua Melanie jalo ka kwa morago.

"Tshwanelo ya thuto," ga bua Arnold.

"Tshwanelo ya go se utlwisiwe botlhoko kgotsa go sotlakiwa," ga bua Nhlayiselo.



Tse ke dingwe tsa ditshwanelo tsa bana.

Re na le ditshwanelo mme e bile gape re na le ditiro. Re na le ditshwanelo le maikarabelo.

Ke maikarabelo afe a bana ba nang le ona?

“Maikarabelo a go thusa kwa gae,” ga bua Ann.



“Maikarabelo a go tlhokomela mmele le tlhaloganyo ya me le go nna le pholo e e edileng,” ga bua Nsuku.

“Tiro ya go tshola ba bangwe ka moo re batlang go tsholwa ka teng,” ga bua Cheyeza.

“Maikarabelo a go dira ka natla kwa sekolong,” ga bua Mixo.



“Maikarabelo a go tlotla ditshwanelo tsa ba bangwe,” ga bua Lerato.

Mongwe le mongwe wa rona o na le maikarabelo a go tlotla ditshwanelo tsa batho ba bangwe.

Batho botlhe ba a lekana.

Letsatsi la Ditshwanelo tsa Botho ke ka ga kgololesego le tekatekano go botlhe.

—Dipotso

1. Goreng 21 Mopitlwe e le letsatsi la boikhutso mo Aforikaborwa?
2. Ditshwanelo tsa botho ke eng?
3. Naya dikao tse tharo tsa ditshwanelo tsa bana.
4. Batlisisa ka ga Molao wa Ditshwanelo wa Aforikaborwa. Kwala lenaane la ditshwanelo.
5. O bontsha jang balelapa la gago gore o a ba leboga?
6. A Molaotlhomo wa Ditshwanelo wa Aforikaborwa o tshwana le Ditshwanelo tsa Batho tsa Ditšhabakopano (*UN*)? Tlhalosa.
7. Molaotheo wa Aforika Borwa o tlhalosa ditshwanelo le ditiro tsa batho botlhe ba ba mo nageng. Batla tshedimosetso ka ditiro tsa baagi ba le batlhano tse di kailweng mo Molaotheong.

—Dibuka tse di mo motseletseleng o

- Letsatsi la Poelano
- Letsatsi la Kgololesego
- Letsatsi la Ngwaoboswa
- Letsatsi la Ditshwanelo tsa Botho
- Letsatsi la Basadi
- Letsatsi la Badiri
- Letsatsi la Bašwa

Kgang e tlhamilwe le go kwalwa ka puo ya Xitsonga, jaaka karolo ya porojeke ya didirswa tsa go buisa ya Zenex Ulwazi Lwethu ya 2020.



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).

**basic education**Department:
Basic Education
REPUBLIC OF SOUTH AFRICA

*The Ulwazi Lwethu readers and storybooks have
been quality assured and approved by DBE.*

Your attribution should include the following:

Title: Letsatsi la Ditshwanelo tsa Botho

Author/s: Arnold Mushwana

Translator/s: Lorato Trok

Illustrator/s: Thulisile Shongwe

Assurer/s: Dineo Moatshe, Opelo Thole

Language: Setswana



© Zenex Foundation - Saide 2025 (Updated Edition)

CC BY includes the following elements:

BY – Credit must be given to the creator

